

四庫全書

集部

欽定四庫全書

集部

宋元詩會卷二十四

詳校官中書_臣陸 湘

主事銜_臣徐以坤覆勘

總校官知縣_臣繆 琪

校對官中書_臣溫汝适

謄錄監生_臣蕭 華

欽定四庫全書

宋元詩會卷二十四

兵部主事陳焯編

黃庭堅

下

送舅氏野夫之宣城

李華二首

籍甚宣城郡風流數貢毛
霜林收鴨脚春網薦琴高
共理須良守今年輟省曹
平生割雞手聊試發硎刀

試說宣城郡停杯且細聽
晚樓明宛水春騎簇昭亭
紀

經豐圩戶析楊卧訟庭謝公歌舞處時對換鵝經

次韻答高子勉

近日坊選將此詩
又入東坡集中

君不居郎省還應上諫坡才高殊未識歲晚喜無它
樞馬羸難出鄰雞凍不歌寒爐餘幾火灰裏撥陰何

呻吟齋睡起

二首

槩几坐清晝博山凝妙香蘭芽依客土柳色過鄰牆
巷僻過從少官閒氣味長江南一枕夢高卧聽鳴榔

牆下蓬蒿地兒童課剪除蔓蒿隨分種杞菊未須鋤河

水傳烽火交州報捷書無能落閒處慙愧飽春蔬

次韻王定國揚州見寄

清洛思君晝夜流北歸何日片帆收未生白髮猶堪酒
垂上青雲却佐州飛雪堆盤鱸魚腹明珠論斗煮雞頭
平生行樂自不惡豈有竹西歌吹愁

寄黃幾復

我居北海君南海寄雁傳書謝不能桃李春風一杯酒
江湖夜雨十年燈持家但有四立壁治病不蕲三折肱

想得讀書頭已白
隔溪猿哭瘴溪藤

寄上叔父夷仲

少年有功翰墨林中歲作吏幾陸沈庖丁解牛妙世故
監市履狶知民心萬里書來兒女瘦十月山行冰雪深
夢魂和月遶秦隴漢節落毛何處尋

次韻宋楙宗三月十四日到西池都人盛觀出遊

金独繫馬曉鶯邊不比春江上水船人語車聲喧法曲
花光樓影倒晴天人間化鶴三千歲海上看羊十九年

還作遨頭驚俗眼風流文物屬蘇仙

次韻楊君全送酒

扶衰却病世無方唯有君家酒未嘗
秋入園林花老眼茗椀文字響枯腸
醉頭夜雨排簷滴盃面春風繞鼻香
不待澄清遣分送定知佳客對空觴

和高仲本喜相見

雨昏南浦曾相對雪滿荊州喜再逢
有子才如不羈馬知公心是後彫松
閒尋書冊應多味老傍人門似更慵

何日晴軒觀筆硯一尊相屬要從容

湖口人李正臣蓄異石九峯東坡先生名曰壺中
九華并為作詩後八年自海外歸過湖口石已
為好事者所取乃和前篇以為笑實建中靖國
元年四月十六日明年當崇寧之元五月二十
日庭堅繫舟湖口李正臣持此詩來石既不可
復見東坡亦下世矣感歎不足因次前韻

有人夜半持山去頓覺浮嵐暝翠空試問安排華屋處

何如零落亂雲中能迴趙璧人安在已入南柯夢不通
賴有霜鐘難席卷袖椎來聽響玲瓏

奉答固道

平生湖海漁竿手強學來操製錦刀末俗相看終眼白
古人不見想山高未乘春水歸行李倘得閒官去坐曹
自是無能欲樂爾煩君錯為歎賢勞

次韻公秉子由十六夜憶清虛

九陌無塵夜際天兩都風物各依然車馳馬逐燈方闌

地靜人閒月自妍
佛館醉談懷舊歲
齊宮詩思鎖今年
但聞公子微行去
門外驂騑立繡韉

謝王烟之惠茶

平生心賞建溪春
一丘風味極可人
香包解盡寶帶胯
黑面碾出明牕塵
家園鷹爪改嘔冷
官焙龍文常食陳
於公歲取壑源足
勿遣沙溪來亂真

徐孺子祠堂

喬木幽人三畝宅
生芻一束向誰論
藤蘿得意干雲日

簫鼓何心進酒樽
白屋可能無孺子
黃堂不是欠陳蕃
古人冷淡今人笑
湖水年年到舊痕

池口風雨留三日

孤城三日風吹雨
小市人家只菜蔬
水遠山長雙屬玉
身閒心苦一春鋤
翁從旁舍來收網
我適臨淵不羨魚
俛仰之間已陳迹
暮牕歸了讀殘書

思親汝州作

歲晚寒侵遊子衣
拘留幕府報官移
五更歸夢三百里

一日思親十二時車上吐茵元不逐市中有虎竟成疑
秋毫得失關何事總為平安書到遲

衝雪宿新寨忽忽不樂

縣北縣南何日了又來新寨解征鞍山銜斗柄三星沒
雲共月明千里寒小吏有時須束帶故人頗問不休官
江南長盡梢雲竹歸及春風斬釣竿

郭明父作西齋于穎尾請予賦詩

食貧自以官為業聞說西齋意凜然萬卷藏書宜子弟

十年種木長風烟未嘗終日不思穎想見先生多好賢
安得雍容一樽酒女郎臺下水如天

戲詠江南土風

十月江南未得霜高林殘水下寒塘飯香獵戶分熊白
酒熟漁家擘蟹黃橘摘金苞隨驛使禾舂玉粒送官倉
踏歌夜結田神社遊女多隨陌上郎

和答孫不愚見贈

詩比淮南似小山酒名麴米出雲安且憑詩酒勤春事

莫愛兒郎作好官
簿領侵尋台相筆
風埃蓬勃使星鞍
小臣才力堪為掾
敢學前人便挂冠

次韻裴仲謀同年

交蓋春風汝水邊
客牀相對卧僧氊
舞陽去葉纔百里
賤子與公俱少年
白髮齊生如有種
青山好去坐無錢
烟沙篁竹江南岸
輸與鷓鴣取次眠

稚川約晚過進叔次前韻贈稚川并呈進叔

人騎一馬鈍如蛙
行向城東小隱家
道上風埃迷卓白

堂前水竹湛清華我歸河曲定寒食公到江南應削瓜
樽酒光陰俱可惜端須連夜發園花

同世弼韻作寄伯氏在濟南兼呈六舅祠部學士
山光掃黛水按藍闌說樽前悵笑談伯氏清修如舅氏
濟南蕭灑似江南屢陪風月乾吟筆不解笙簧醉舞衫
只恐使君乘傳去拾遺今日是前銜

次韻蓋郎中率郭郎中休官

二首

仕路風波雙白髮閒曹笑傲兩詩流故人相見自青眼

新貴即今多黑頭
桃葉柳花明曉市
荻芽蒲筍上春洲
定知老健休官去
酒戶家園得自由

世態已更千變盡
心源不受一塵侵
青春白日無公事
紫燕黃鸝俱好音
付與兒孫知伏臘
聽教魚鳥逐飛沈
黃公壚下曾知味
定是逃禪入少林

次韻答柳通叟求田問舍之詩

少日心期轉繆悠
蛾眉兒姁且障羞
但令有婦如康子
安用生兒似仲謀
橫笛牛羊歸晚徑
捲簾瓜果熟西疇

功名可致猶回首何況功名不可求

謝送宣城筆

宣城變樣蹲

一作
尊

雞距諸葛名家埒

一作
持

鼠鬚一束喜

從公處得千金求買市中無漫投墨客摹科斗勝與朱
門飽蠹魚愧我初非草玄手不將閒寫吏文書

次韻寅菴

二首

兄作新菴接舊居一原風物萃庭隅陸機招隱方傳洛
張翰思歸正在吳五斗折腰慚僕妾幾年合眼夢鄉閭

白雲行處應垂淚黃犬歸時蚤寄書

大若塘邊獨網魚小桃源口帶經鋤詩催孺子成雞枊
茶約鄰翁掘芋區苦棟狂風寒徹骨黃梅細雨潤如酥
此時睡到日三丈自起開關招酒徒

和師厚郊居示里中諸君

籬邊黃菊關心事牕外青山不世情江橘千頭供歲計
秋蛙一部洗朝醒歸鴻往燕競時節宿草新墳多友生
身後功名空自重眼前樽酒未宜輕

次韻胡彥明同年羈旅京師寄李子飛

看除日月坐中銓一歲應無官
九遷蔥韭盈盤市門食
詩書滿枕客牀羶留連節物孤
朋酒惱亂鄰翁謁子錢
誰料丹徒布衣侶困窮且忍試
新年

出迎使客質明放船自瓦窑歸

鼓吹喧江雨不開丹楓落葉放
船回風行水上如雲過
地近嶺南無雁來樓閣人家捲
簾幕菰蒲鷗鳥樂灣洄
惜無陶謝揮斤手詩句縱橫付
酒杯

題安福李今朝華亭

丹楹刻桷上崢嶸表裏江山落眼平
曉日成霞張錦綺青林多露綴珠纓
人如旋磨觀羣蟻田似圍碁據一枰
對案昏昏迷簿領暫來登覽見高明

寄舒申之戶曹

吉州司戶官雖小曾屈詩人杜審言
今日宣城讀書客還趨手版傍轅門
江山依舊歲時改桃李欲開烟雨昏
公退但呼紅袖飲剩傳歌曲教新翻

奕碁一首呈任公漸

偶無公事客休時席上談兵校

一作角

兩碁心似蛛絲遊

碧落身如蝸甲化枯枝湘東一目誠甘死天下中分尚
可持誰謂吾徒猶愛日參橫月落不曾知

秋懷

秋陰細細壓茅堂吟蟲啾啾作夜涼雨開芭蕉新間舊
風撼簷簷宮應商砧聲已急不可緩簷景既短難為長
孤裘斷縫棄牆角豈念晏歲多繁霜

四月末天氣陡然如秋遂御袂衣遊北沙亭觀江

漲

沙岸人家報急流船官解纜正夷猶震雷將雨度絕壑
遶水粘天吞釣舟甚欲去揮白羽策可堪更著紫茸裘
平生得意無人會浩蕩春鋤且自由

趙令許載酒見過

玉馬何時破紫苔南溪水滿綠徘徊買魚斫鱸須論網
撲杏供盤不數枚廣漢威名知訟少平原樽俎費詩催

草玄寂寂下簾幙稍得閒時公合來

登南禪寺懷裴仲謀

茅亭風入葛衣輕坐見山河表裏清
歸燕略無三月事殘蟬猶占一枝鳴
天高秋樹葉公邑日暮碧雲樊相城
別後寄詩能慰我似逃空谷聽人聲

夏日夢伯兄寄江南

故園相見略雍容睡起南牕日射紅
詩酒一年談笑隔江山千里夢魂通
河天月暈魚分子槲葉風微鹿養茸

幾度白沙青影裏審聽嘶馬自揅筇

一作白髮倚門愁絕處可堪衣斷去

縫時

同孫不愚過昆陽

田園恰值春忙驅馬悠悠昆水陽古廟藤蘿穿戶牖
斷碑風雨碎文章真人寂寞神為社堅壘委蛇女採桑
拂帽村帘誇酒好為君聊解一瓢嘗

題雙鳧觀

飄蕭閱世等虛舟歎息眼前無此流滿地悲風盤翠竹

半叢寒日破紅榴青山空在衣冠古白鶴不歸宮殿秋
王令平生樽酒地千年萬歲想來遊

雪中連日行役書簡同僚

簡書催出似驅雞聞道饑寒滿屋啼炙背宵眠楮火
嚼冰晨飯薩波蠶風如利劍穿狐腋雪似流沙飲馬蹄
官小責輕聊自慰猶勝擲甲去征西

客自潭府來稱明因寺僧作靜照堂求予作

客從潭府渡河梁藉甚傳誇靜照堂正苦窮年對塵土

坐令合眼夢湖湘市門曉日魚鰕白鄰舍秋風橘柚黃
去馬來舟爭歲月老僧元不下繩牀

喜念四念八至京

朔雪蕭蕭映薄幃夢回空覺淚痕稀驚聞庭樹烏烏樂
知我江湖鴻雁歸拂榻喜開姜季被上堂先著老萊衣
酒樽烟火長相近酬勸從今更不違

謫居黔南

五首

相望六千里天地隔江山十書九不到何用一開顏

霜降水反壑風落木歸山冉冉歲華晚昆蟲蚤閉關
冷淡病心情暄和好時節故園音信斷遠艸親賓絕
山郭燈火稀峽天星漢少年光東流水生計南枝鳥
冥心齊近遠委順隨南北歸去誠可憐天涯住亦得

題鄭防畫冊

惠崇烟雨歸雁坐我瀟湘洞庭欲喚扁舟歸去故人言
是丹青

有惠江南帳中香者戲作

螺甲割崑崙耳香材屑鷓鴣斑欲雨鳴鳩日永下帷睡
鴨春閒

病起荆江亭即事

六首

維摩老子五十七天子大聖初元年傳聞有意用幽側
病著不能朝日邊

司馬丞相昔登庸招用元老超羣公楊綰當朝天下喜
斷碑零落卧秋風

文章韓杜無遺恨草詔陸贄傾諸公玉堂端要真學士

須得儋州禿鬢翁

閉門覓句陳無已對客揮毫秦少游
正字不知溫飽未西風吹淚古藤州

張子耽酒語蹇吃聞道潁州又陳州
形模彌勒一布袋文字江河萬古流

魯中狂士邢尚書本意扶日上天衢
惇夫若在鑄此老不令平地生崎嶇

謝答聞善二兄

二首

公擇醉面桃花紅人百忤之無愠容莘老夜闌傾數斗

焚香默坐日生東

李公擇尚書
孫莘老中丞

陶令舍中有名酒無夕不為父老傾四坐歡欣觀酒德
一燈明暗又詩成

戲贈米元章

二首

萬里風帆水著天麝煤鼠尾過年年滄江靜夜虹貫月
定是米家書畫船

我有元暉古印章印刻不忍與諸郎虎兕筆力能扛鼎

教字元暉繼阿章

往歲過廣陵值蚤春嘗作詩云春風十里珠簾捲
髣髴三生杜牧之紅葉梢頭初繭栗揚州風動
鬢成絲今春有自淮南來者道揚州事戲以前
韻寄王定國

淮南二十四橋月馬上時時夢見之想得揚州醉年少
正圍紅袖寫烏絲

從張仲謀乞蠟梅

聞君寺後野梅發香蜜染成官樣黃不擬折來遮老眼
欲知春色到池塘

雨中登岳陽樓望君山

二首

投荒萬死鬢毛斑生入瞿塘滌潏關未到江南先一笑
岳陽樓上對君山

滿川風雨獨凭欄綰結湘娥十二鬟可惜不當湖水面
銀山堆裏看青山

寄賀方回

少游醉卧古藤下誰與愁眉唱一盃解作江南斷腸句
只今唯有賀方回

戲答王子予送凌風菊

病來孤負鷓鴣杓禪板蒲團入眼中浪說閒居愛重九
黃花應笑白頭翁

和陳君儀讀太真外傳 三首

扶風喬木夏陰合斜谷鈴聲秋夜深人到愁來無處會
不關情處總傷心

梁州一曲當時事
記得曾拈玉笛吹
端正樓空春晝永
小桃猶學淡燕支

高麗條脫珣紅玉
邂逅琵琶樵綠絲
蛛網屋煤昏故物

一作脂
澤歇

此生唯有夢來時

夜發分寧寄杜澗叟

陽關一曲水東流
燈火旌陽一釣舟
我自只如常日醉
滿川風月替人愁

春近 二首

閨後陽和臘裏回濛濛小雨暗樓臺柳條榆莢弄顏色
便恐入簾雙燕來

梅英欲盡香無賴草色才蘇綠未勻苦竹空將歲寒節
又隨官柳到青春

胡致隆

號蕭灘居士與

黃庭堅友善

分題賦藕

平生冰雪姿七星羅心胸豈無有絲毫上裨天子聰而

不自薦達胡為乎泥中沈疴正無賴安得君從容其子
亦可憐風味如乃翁

落星樓即事

葛巾藤杖竹籬籬夜靜江樓縱目初海獸擎山出彭蠡
玉龍銜水下匡廬三更雲淨猿啼露十里月寒人捕魚
已問湖山借圭角他年來此老樵漁

仰山寺

山下清泉迸石流山前松竹自春秋猿吟古寺偏深處

雲集羣峰最上頭一老有靈飛宰堵二神無語鎖寒秋
諸天更在藤蘿外欲踏層巔悵末由

洪朋

南昌人洪師民子芻之兄也芻進士官諫議大夫
著老圃集職方乘按黃山谷四甥時號豫章四
洪曰駒父玉父鴻父龜父而龜
父詩最為山谷所賞即朋也

春風

春風吹桃李欵然滿中園羣動不遑息蝴蝶紛飛翻我
亦感茲時步屨遶林間顏色豈不好持久良獨難置酒

休其下聊復罄余歡君看桃與李成蹊亦無言

獨步懷元中

淨盡西山日深行城北村琅璫鳴佛屋薜荔上僧垣時
雨慰枵腹夕風清病魂所思渺江水誰與共忘言

宿范氏水閣

枕水鑿疏檻雲扉夜不扃灘聲連地籟林影亂天星人
靜魚頻躍秋高露欲零何妨呼我友乘月與揚舲

晚登秋屏閣示杜氏兄弟

病人湯熨暫時停謾向秋屏臺上行白日忽隨飛鳥去
青山斷處落霞明林間嘒嘒寒蟬急江上悠悠烟艇橫
富貴功名付公等嗟予老矣負平生

洪炎

字玉父見
洪朋傳

袁遯翁雲溪居

水竹依山住烟霞竝舍分秋添中夜雨冷沒一溪雲

洪芻

字駒父見

洪朋傳

廬山紫霄峯有禹刻石室

塊視落星石杯觀彭蠡湖荒哉秦漢君抗旌上崎嶇永

懷太史公九江觀禹摹

賈收

字耘老湖州人有水閣在苕溪上景物清曠沈會
宗為賦天仙子詞一時傳誦之後作杭州有美堂

詩見賞於東坡遂定交焉

有美堂

自刊宸畫入雲端神物應須護翠巒吳越不藏千里色
斗牛常占一天寒四簷望盡回頭嬾萬象撥來下筆難
誰信靜中踈拙意略無蹤跡到波瀾

李彭

洪舅兄弟之友
集中多倡和詩

阻風雨封冢市

往歲李成寫驟雨萬里古意毫端聚行人深藏鳥不度
便覺非復鵝溪素龍眠老阮作陽關北風低草雲堆山

行人客子兩愁絕未信蒲萄能解顏二公了了解人意
似是畫我封家市戲作新詩排畫睡忽有野雁鳴烟際
夢訪友生

少年結客長安城妄喜縱酒同章程支離老去一茅屋
枕書臥聳長短更友生相望止百里寒夜寥濶無微聲
夢中乘興輒見戴剡溪聊爾扁舟行覺來蘧蘧一榻上
不用童僕爭驩迎吹燈弄筆欲書寄牕前白月方亭亭

題呂少馮聽雨堂

碧澗寒侵屋幽雲夜度牆貪看山入坐怪聽雨鳴廊苦
乏陰鏗句聊登孺子牀非君無汲引寄傲學潛郎

望西山懷駒父

去歲湖湘賦凜秋聞君江國大刀頭百年會面知幾遇
十事欲言還九休照眼遙岑落懷袖過眉拄杖立汀洲
漫言青山淡吾慮誰料却能生許愁

楊傑

字次公無為人少有名于世元豐中官太常者數
任一時禮樂之事皆與討論神宗命秘監劉几禮

待范鎮議禮器几請命傑同議乃陳太樂七失併圖上之鎮不用傑議哲宗即位言樂者又主范鎮傑力言其非鎮說遂格不行元祐中為禮部員外郎出知潤州除兩浙提點刑獄卒有集二十卷

勿去草

勿去草草無惡若比世俗浮薄君不見長安公卿家
公卿盛時客如麻公卿去後門無車唯有芳草年年加
又不見千里萬里江湖濱觸目淒淒無故人唯有芳草
隨車輪一日還舊居門前草先除草於主人實無負主
人於草宜何如勿去草草無惡若比世俗浮薄

題吹衣亭

馬上衣衫浣塵土，飲版權門腰偃僂。
冷風天上呼不來，厚顏如甲汗如雨。
星郎高韻凌雲烟，天籟喚歸酌流泉。
人間熱惱醺不到，亭上鶴衣飄吹仙。
君方醉樂人愁絕，何如御此登天闕。
叩天借取衣上風，吹下九州作春色。

南城白雲山悼虎巖上人

白雲隨師來，師逐白雲止。
山空師何在，木末白雲起。

楊蟠

字公濟章安人舉進士為密和二州推官歐陽修稱其詩蘇軾知杭州時通判州事倡酬居多後

知壽

州卒

就食

未知田上勞徒厭鼎中味及與農事接方知食者貴余
生寡營求念此豈易致况敢懷寸祿平居但羞愧

寄東山禪師

高卧西林月孤閒獨有君杖藜循澗水敲枕看山雲鹿
過何人見猿啼只自聞篇章知不少寄我莫辭勤

春日獨遊南園

天淨鳥飛遠路幽花自香春風吹草木野水滿池塘事
去青山在人閒白日長興來搔短髮微意久難忘

郡中書事

把麾何所往海上有名山潮落魚爭拾雲低雁可攀一
城仙島上雙塔畫圖間當路誰知已天應賜老閒

和東山禪師南澗傍遊戲呈公濟冲晦

澗南一嘯清風發林下重來白日長雲遠石深連鷺嶺

水寒沙淺似魚梁，漫因野老詢前事。
閒伴幽人擷衆芳，更欲窮源情未已。
知君嗔我索歸忙。

酬仲靈同遊天竺兼呈伯周禪老

不問猿崖鳥道深，攜筇著屐伴君尋。
山中桂子驚寒夜，雪後梅花逼歲陰。
欲住更逢青眼顧，相看須盡白頭吟。
他年倘續高僧傳，未放湯休與道林。

陪潤州裴如晦學士遊金山回作

世上蓬萊第幾洲，長雲漠漠鳥飛愁。
海山亂點當軒出，

江水中分遶檻流天遠樓臺橫北固夜深燈火見揚州
迴船却望金陵月獨倚牙旗坐浪頭

酬東山禪師喜公濟沖晦過訪作

數百招提隱亂峰蒼茫那辨講堂鐘春酣賴得黃鸝報
路轉唯尋白鹿蹤菴在月邊長不鎖興來天外忽相逢
山人莫笑衣冠客亦有梁鴻待賃春

蚤過天竺呈明智及同遊二老

雨過靈峰卧竹牀平明屐齒到雲堂門前雨過新溪滿

石上風回舊草香山抱鐘聲圓不散雲鋪瓦面冷無光
理公莫怪詩相惱今日偕行總姓湯

秦王纜船石

色陰長帶雨疑是白雲根欲問東巡事今猶不敢言

章 案

字質夫浦城人用蔭為孟州司戶參軍應舉入京
棄父封對簿干魏棄不就試馳往直其寬選試禮
部第一擢知陳留縣歷提舉陝西常平京東轉運
判官成都路轉運使入為考功以直龍圖知慶州
乘便討夏人屢挫其鋒除知同州徙應天府知廣
州轉江淮發運使哲宗訪以邊事對稱旨命知渭

州用其策築峽江口好水河二城進奪疆境擊敗
夏衆用輕騎夜襲執其統軍夏主震駭上御紫宸
殿受賀擢密直端明殿學士進階大中大夫所
立邊功為四方最徽宗立請老授資政殿學士未
幾卒謚
莊簡

海棠軒

珍葩寄幽島正對孤軒植優柔自俯仰紅綠若組織春
酣晴日曛坐久濃香逼池面淨可鑑朝霞罩澄碧

潺玉亭

傍砌醺小渠回環是流水石唇吐珠涎清響醒人耳風

微竹影碎月皎波光起颯爽無塵囂靜適心所喜

茅菴

竹間構圓菴所向自瀟灑珍禽弄巧舌宛是居山野默
坐見真心萬緣盡虛假勿陋尋尺地茲焉息意馬

水閣

架木浮水中略約通孤島扶疎花影反潑刺跳魚小風
月所得多經營信云巧隱几寂無人朱欄萃幽鳥

月臺

蜀地饒夜雨輕陰多蔽天見月月無幾築臺邀嬋娟高
凝桂影近俯視雲屋連顧盼已塵外欲挹瑤宮仙

宋元詩會卷二十四

欽定四庫全書

宋元詩會卷二十五

兵部主事陳焯編

陳襄

字述古侯官人少孤能自立舉進士調浦城主簿攝令事發姦如神知河陽縣當富弼為郡守一見即禮遇之及入相薦為秘閣校理判祠部出知常州入為開封府推官鹽鐵判官神宗立奉使朔方明年同修起居注知諫院改侍御史知雜事力論青苗法不便乞貶王安石呂惠卿以謝天下又請罷韓絳政府用杜大丘爭利而進者皆不聽召試知制誥辭不就試願補外帝特留修起居注踰年

為知制誥安石欲出之帝不許尋直學士院安石
益忌之摘其書詔小失出知陳州徙杭州以樞密
直學士知通進銀臺司兼侍
讀判尚書都省卒年六十四

送關都官致仕

鴻雁于飛送關公也公能以禮致仕惜其有老成德
不衰不養于朝天子不用古禮留之故作是詩也

鴻雁于飛歸戾于澤君子于田亦適維則旅力不憊曷
云其極庶民之耄職自為愚君子之耄其德有濡旅力
不憊曷云其劬有堅栢君子斧之有實秬稷農夫有

之天子有老曷其與歸野有白駒來食我粢君子之往
胡為不留我心悠悠為天子之憂

洛陽曲

有客頓征轡暮宿洛陽堤洛陽繁華地慨然心傷悲憶
昔季倫家朱門鼎貴時錦步四十里冠蓋相追隨寵移
百琲珠醉擊珊瑚枝一旦委溝壑身隨朝露晞綺樓日
顛仆金谷無人歸綠珠千古魂散作香塵飛荒榛塞中
道惟有寒螢啼嗟哉百世後驕奢徒爾為

荔枝歌

番禺地僻嵐烟鎖萬樹纍纍產嘉果漢宮墜落金莖露
秦城散起驪山火炎炎六月朱明天映日僊枝紅欲焚
自古清芬不能遏留得嘉名為堪仙上皇西去楊妃死
蠻海迢迢千萬里華清宮闕閒無人南來不見紅塵起
至今榮植徧閩州離離朱實繁星稠一日為君空變色
千里憑誰速置郵可憐錦幄神仙侶為飲凝漿滌煩暑
綺筵不惜十千錢醕酎秦樓桂花醕秦樓女子繡羅裳

鳳簫鳴咽流宮商醉歌一曲荔枝香席上少年皆斷腸
古靈山試茶歌

乳源淺淺交寒石松花墮粉愁無色明皇玉女跨神雲
鬪剪輕羅縷殘碧我聞巒山二月春方歸苦霧迷天新
雪飛仙鼠潭邊蘭草齋霧牙吸盡香龍脂轆轤繩細井
花暖香塵散碧瑠璃椀玉川冰骨照人寒瑟瑟祥風滿
眼前紫屏冷落沈水烟山月堂軒金鴨眠麻姑癡煮丹
井泉不識人間有上僊

此景

晚嶠殘霞斷晴空宿靄收綠蕪天共遠明月水同流落
葉填秋望孤碁答旅愁提壺伴詩筆獨醉庾公樓

幽齋

幽徑絕塵蹤莓苔上粉墉秋聲連夜雨寒色一溪松學
有書千卷歡無酒萬鐘雲屏孤夢斷寂寞掩巫峰

金華山人

幽居倚翠巒塵事不相干天地醉來小琴碁靜裏歡雨

苔春徑綠風竹夜牕寒若問長生術金爐有寶丹

黑崖道中作

陰山沙漠外六月苦行人水迸金蓮曉湯回鐵腳春馬
饑思苑草僕病臥邊塵夜夢金華阻披衣望北辰

舟次巴峽

江流何險阻次第入三巴崖斷時無路山深更有家鄰
蔬饒竹筍鄉果足枇杷況有荊州醢淹留不用嗟

春日賞林亭

把酒春亭覽衆芳
水精簾箔逗山光
孤松冷落千年換
野槿紛華一日香
綠圃烟深迷蛺蝶
曲池波暖睡鴛鴦
文園莫惜駟裘費
買取宜城作醉鄉

寄遠

飛鵲翩翩暮欲棲
楚天新月射璇題
袖中已滅三年字
心曲惟通一點犀
步障影迷金谷路
桃花香隔武陵溪
瑤華好折無人寄
腸斷江樓百尺梯

夜意

熏爐香燼蕙烟沈凜冽寒生翡翠衾月國音塵千里絕
仙山樓閣五雲深離懷暗耿金壺漏獨夢多驚玉女碁
騎省中郎才調逸擬將文筆賦秋心

和正辭職方以濬河留滯

萬鍾如雲濬禹溝荀卿橋畔艤行舟珠躔合照賢人聚
銀漢無波海客留且作東山攜妓樂未應南浦送君愁
辛夷花發春醅熟只俟郊原雨少休

和徐通判九月望日始見菊花

月滿霜飛菊始華幽叢冷落帶烟斜
籬邊過却重陽酒澤畔誰憐野草花
湖學先生歸解組安州司戶老居家
皆因晚節無人用隕涕臨風為爾嗟

登雄州南門偶書呈知府張皇城

城如銀甕萬兵環悵望孤城野麥間
陂面綠陰通易水樓頭青靄見狼山
漁舟掩映江南浦使驛差池古北關
雅愛六韜名將後塞垣無事虎貔閒

使還咸熙館道中作

土曠人稀驛路賒山中殊不類中華白沙有露鴛鴦泊
芳草無情妯娌花壇館夜燈眠使節石梁秋吹動邊笳
歸來覽照看顏色斗覺霜毛兩鬢加

重陽閣下和同舍

君逢佳節憶還家我亦淹留感歲華清禁雙書驚白髮
故園吹帽負黃花謝安行有登山屐揚子居無載酒車
何日得歸溪上隱大收圖史作生涯

東園觀雪

風毛雨絮小園東。天幙低垂慘澹空。
蘋浦萬家雲覆瓦，花溪千樹玉彫籠。
穿林已奪春梅蚤，夾隴潛滋夏麥豐。
相酌狐衣雖可賦，豈無捐瘠在溝中。

古城

蘆葦蕭疎天氣清。水含山色照重城。
綠蕪何處管絃地，碧落舊時鐘鼓聲。
三峽橋邊秋雨過，六鼇宮裏夜潮生。
蕭郎秦女無歸約，十二樓臺空月明。

和子瞻京口憶西湖寒食出遊見寄一首

春陰漠漠燕飛飛可惜春光與子違
半嶺烟霞紅旆入滿湖風月畫船歸
緱笙一闋人何在遼鶴重來事已非
猶憶去年題別處鳥啼花落客沾衣

送別探得南字

謫宦情牢落窮通理更諳讀書不廢事
道古亦何慙昔喜鄰州守嘗陪後乘驂
西湖遊未厭北海飲方酣躡屐扳雲嶠
捫蘿訪竹菴鷺濤千頃雪鷺嶺萬堆藍
聲遇時難一睽離歲忽三陪京方接畛
歸省會同參士子文宗

愈朝廷禮問時好留君左右俄領罷東南歲旱錢仍貴
民饑命不堪下車寬賦役露冕訓田蠶畫舸乘春別新
書卜日覃牙旗風發發瑞節虎耽耽龍鳳吳王國烟霞
古佛龕荷香輕泛浦桂子靜飄嵐草澤行吟苦蘭陵奉
養甘子文無愠色夷甫足清談物外冥天籟樽前據石
楠惟應憐舊尹漁釣負江潭

秦觀

字少游一字太虛高郵人少豪俊工文詞以黃樓
賦見蘇軾於徐州軾稱其有屈宋才登第調定海

主簿用軾薦除國博遷秘書省正字兼國史編修紹
聖初坐黨籍出判杭州言者謂其增損寶錄貶監
處州酒稅再削秩徙彬州編管橫州又徙雷州徽
宗立復宣德郎放還至藤州出遊華光亭索水欲
飲水至笑視之而卒年
五十三有文集四十卷

春日雜興

四首

潭潭故邑井猗猗上宮蘭不食自清潔莫服更幽閒志
士恥弱植卷跡甘饑寒佳晨追長觀觸物懸悲端川途
眇回遠經歲曠音翰豈不慕裘馬詭得非所安蟬冕多
怵迫繩樞歎憂患枉尋竟何補方枘誠獨難

寢瘵倦文史駕言從遨嬉颼風舉遙淑規日麗清漪含
桃粲朱實杜若懷碧滋娉娉弱絮墮圍圍文魴馳明霞
廓遠矚哀禽攬離思縛草天際合孤雲川上移寬閒絕
輪鞅重復多路岐信美難久佇歸歟從所治

昔我遊京室交通五陵間主客各英妙袍馬相追攀千
金具飲啜百金顧吹彈纓弁羅廣席當頭舞交竿鮮妝
耀涿酒采纈生風瀾燈燭暗夜艾士女紛相班歡娛易
祖歇轉盼如飛翰疊疊負孤願離離銜永歎山鳥窺茗

飲簷花笑蔬餐棄捐勿重陳事定須益棺

藝籍燔祖龍斯文就淪喪帝矜黔首愚諸雋

一作雄

出相

望揚馬操宏綱韓柳激頽浪建安妙謳吟風槩亦超放
玉繩帶華月艷艷青冥上奕世希末光經緯得無妄兒
曹獨何事詆斥幾覆轡原心良自誣猥欲私所尚螳螂
拒飛轍精衛填溟漲吐吐徒爾為滄海固無恙鵝鸞日
彫滅黃口紛冗長投袂睇層霄茲懷誰與亮

寄題傅欽之草堂

河陽有汭流經營太行根盛德不終晦發為清濟源斯
堂濟源上太行正當門仰視浮雲作俯窺流水奔脩竹
帶藩籬百禽鳴朝暾相望有盤谷李愿故居存主人國
之老實惟商巖孫班行昔供奉亟進逆耳言天子色為
動羣公聲亦吞蕭條冰霜際不改白玉溫出處士所重
其微難具論公勿思草堂朝廷待公尊

次韻邢敦夫秋懷

四首

渤海有巨鼇其顛冠嵯峨宿昔常小朴八絃相盪摩忽

遭龍伯入一舉空潮波取皮煎作膠清此崑崙河
蝮蛇初螫手壯士斷其腕豈不悲毀傷所卹在軀幹西
羌沙鹵地置戍或煩漢雞肋不足云阿瞞妙思算

匠氏構明堂百木入斤斧儻非豫章材冗長亦焉取英
英范與蘇器識兼文武胡為老一州不用作霖雨
憬彼高句麗來修荒貢職天都富如海勞汝送涓滴舳
艫尾相銜遠近困供億止沸當絕薪揚湯百無益

同子瞻端午日遊諸寺賦得深字

太史抱孤韻暢懷在登臨別乘慙鄒枚佳辰事幽尋參
差水石瘦宵窈房櫳深清磬發疎箔妙香橫素襟復登
窳堵坡環回矚嶽嶺雙溪貫城郭暝色帶孤禽涼颺動
爽籟薄雨生微陰塵想澹清漣牢愁洗芳斟揮筆訂往
古援毫示來今悔無刻燭敏續此金玉音

寄陳季常

一鉤五十牯始具任公釣揭竿趨灌瀆與爾不同調先
生本西蜀俠氣見英妙哀憐世間兒細點似黃鵠侍童

雙摧玉鬢髮光可照駿馬錦障泥相隨窮海嶠平生攜
手好十七登廊廟小生相吏耶徒枉尺書召暮年更折
節學佛得心要鬻馬放阿樊幅巾對沈燎泠泠屋外泉
兀兀原頭燒欲知山中樂萬古同一笑

雷陽書事

三首

駱越風俗殊有疾皆勿藥束帶趨祀房瞽史巫紛若絃
歌薦繭栗奴主洽觴酌呻吟殊未央更把雞骨灼

一笛一腰鼓鳴聲甚悲涼借問此何為居人朝送殤出

郭披莽蒼磨刀向猪羊何須作佳事鬼去百無殃
舊傳日南艷野女出成羣此去尚應遠東門已如雲蚩
氓託絲布相就通慙慙可憐秋胡子不遇卓文君

海康書事

十首

白髮坐鉤黨南遷瀕海州灌園以餬口身自雜蒼頭籬
落秋暑中碧花蔓牽牛誰知把鋤人舊日東陵侯
荔子無幾何黃柑遽如許遷臣不惜日恣意移寒暑層
巢俯雲水信美非吾土草芳自有時鵬鵠何關汝

卜居近流水小集依嶽岑終日數椽間但聳鳥遺音鑪
香入幽夢海月明孤斟鷓鴣一枝足所恨非故林
培塿無松栢駕言出焉遊讀書與意會却掃可忘憂尺
蠖以時屈其信亦非求得歸良不惡未歸且淹留
粵女市無常所至輒成區一日三四遷處處售鰕魚青
裙脚不襪臭味猿與狙孰云風土惡白州生綠珠
海康臘已酉不論冬孟仲殺牛撾祭鼓城郭為沸動雖
非堯歷頌自我先人用大笑荆楚人嘉平獵雲夢

粲粲菴摩勒作湯美無有上客賦驪駒玉奩開素手那
知蒼梧野棄置同芻狗荆山玉抵鵲此事繇來久

裔土桑柘稀蠶戶不紡績吳綃與魯縞取具網船客一
朝南風下家室相咻迫半賈鬻我藏倍稱還君息

一雨復一暘蒼茫颶風發怒號兼晝夜山海為顛蹶云
何大塊噫乃爾不可遏黎明衆竅虛白日麗空濶

合浦古珠池一熟胎如山試問池邊蜺云今累年閒豈
無明月珍轉徙溟渤間何關二千石時至自當還

右雷陽書事三首海康書事十首曹能始陳仲醇諸
君皆以其詩入東坡集中近日坊刻詩鈔則將雷州
三首互見東坡淮海二集而海康十首則專屬少游
俾覽者莫適為主焯按宋史兩公遷謫日月又考東
坡年譜此十三首皆秦作非蘇詩也蓋蘇公於紹聖
丁丑從惠州安置昌化其弟子由亦謫雷州是年五
月十一日公過子由於藤因同行至雷六月十一日
公別子由渡海屈指在雷未嘗一月淹也且其時公

方病痔呻吟何暇詳究雷陽風俗而書之況灌園餬
口鷓鴣一枝皆屬久居之事乎少游從橫州徙雷州
終哲宗之世至徽宗改元始得放還宜乎其屬詠之
多也

幽眠

幽眠起常晚冬晷復不長中間數十刻倏如驚燕翔晨
餐粗云畢申鼓鳴相望忽忽竟何就念之動中腸天地
一逆旅死生猶轉商暫來旋云去遲速乃所常較計亦

何補徒然費慨慷不如聽兩行一槩付酒觴北風吹老
槐白日轉紙牕布衾一覺睡身世成渺茫宿莽冬不衰
蘭茝幽更芳無庸傷局促速此鬢髮霜

隕星石

蕭然古丘上有石傳隕星胡為霄漢間墜地成此精雖
有堅白姿塊然誰汝靈犬眠牛礪角終日蒙羶腥疇昔
同列者到今司賞刑森然事芒角次第羅空青俛仰一
氣中萬化無常經安知風雲會不復歸青冥

山陽阻淺

一日行一尺十日行一丈豈不歎淹留所幸無波浪悲
風動深夜原野渺森爽青天行蟾蜍枯水轉魍魎此時
蓬茅下去心劇於癢棄置勿復論通塞如反掌

送洪景之循州參軍

寒梅不自重輒花桃李先矯枉有佳菊最後衆芳妍各
因一時美難以相啗憐物理固若是士林亦宜然夫子
南國俊聲猷推妙年數奇晚方偶參軍古龍川龍川雖

云遠風物號清鮮羅浮不相下頡頏巉荒天雲鬢二三
子聊足奉周旋行矣試老拳歸歟遠翔騫

茶

茶實嘉木英其香乃天育芳不愧杜蘅清堪揜椒菊上
客集堂寮圓月探奩盃玉鼎注漫流金碾響杖竹侵尋
發美鬯旖旎生乳栗經時不銷歇衣袂帶紛郁幸蒙巾
笥藏苦厭龍蘭續願君斥異類使我金芬馥

擬孟郊

曉風有暴信暮蟬無好聲曉風與暮蟬自與時節爭獨
客辭故鄉推車謁梁城梁城道迢遞區區役吾生不如
歸舊山藜藿安性情

陳令舉妙奴詩

西湖水滑多嬌嬌妙奴十二正芬芳肌膚皙白髮腳長
含語未發先有香溪上夜燕侍簪裳皎如華月墮滄浪
音聲入雲能斷腸不許北客辭酒漿主人藹藹邦之良
少年射策謁未央俊詞偉氣森開張玉杓貫斗生怒芒

天欲文采老更昌故使欽翮窺羣翔五十僅補尚書郎
浩歌騎牛倚徜徉東風戲雨花草狂二溪泱泱青黛光
妙奴勿倦侑羽觴主人正欲遊醉鄉

和王通叟琵琶夢

鷓鴣鳴時衆芳歇草堂夢斷音容絕風驚玉露不成圓
一夜芙蓉泣秋月金紋捍面紫檀槽曾把花前送酒舳
庾郎江令費珠璧小斫紅牋揮兔毫風流雲散令人瘦
忍看麴塵昏錦綬楚水悠悠更不西上天破鑑空依舊

輦下春晴

樓闕過朝雨參差動霽光
衣冠紛禁路雲氣繞宮牆
亂絮迷春濶
蕙花困日長
經旬牽酒伴猶未獻長楊

睡起

睡起東軒下悠悠春緒長
爬搔失幽囀款欠墮危芳
蛛網留晴絮蜂房受晚香
欲尋初斷夢雲霧已冥茫

對淮南詔獄

淮海行搖落文書亦罷休
風霜欺獨宿燈火伴冥搜
笳

動朱樓曉參橫粉堞秋更拚飛鏡破應得大刀頭

次韻答米元章

嗜好清無滓周旋粲有文揮毫春在手岸幘海生雲花
鳥空撩我尊鱸正屬君惟應讀雌蜺差不愧王筠

宿參寥房

鄉國秋行暮房櫬日已暝驚風多犯竹破月不藏星鉤
箔簷風動抄書燭燼零非關相見喜自是眼長青

次韻傳道自適兼呈都司芸叟學士

楚國陳夫子周南久滯留
敝袍披槁葉瘦馬兀扁舟
藥餌過三伏文書散百憂
何人共禪悅居士有浮休

謝李安上惠茶

故人蚤歲佩飛霞故遣長鬚致茗芽
寒橐遽收諸品玉午甌初試一團花
著書懶復追鴻漸辨水時能效易牙
從此道山春困少黃書剩校兩三家

題閭求仁虛樂亭

長官平昔嗜林丘僧與開亭待勝遊
脩竹回環扶碧瓦

小池方折轉清流春深鷓鴣催詩句夜靜蟾蜍入釣舟
只恐政成留不得將人空此憶常遊

流觴亭次韻

卧龍西畔北池頭水擘華堂瑟瑟流幾曲漪連盤翠帶
一峯孤聳落蒼虬香囊近午清無汗素扇生涼爽入秋
待喚畫師來貌取圖成便是竹溪遊

別程公闢給事

人物風流推鎮東夕郎持節作元戎樽前倦客劉師命

月下清歌盛小叢
裘敝黑貂霜正急
書傳黃犬歲將窮
買舟江上辭公去
迴首蓬萊夢寐通

遊龍門山次程公韻

路轉橫塘入亂峯
遍尋瀟灑興無窮
樓臺特起喧卑外
村落隨生指點中
溪傍五雲清逗玉
松分八面翠成宮
歸途父老欣相語
今日程公肯謝公

遊龍瑞宮次韻

靈祠真館閔山隈
形勢相高對越臺
莓徑翠依屏上轉

藕花紅繞鑑中開
鶴銜寶箭排烟去
龍護金書帶雨來
夾道萬星攢騎火
滿城爭看使君回

酬朱李二君見寄

東阡北陌坐淹時
偶為高風振羽儀
十丈蓮花開處遠
三年楮葉刻成遲
鬢毛但速安仁老
錢粟難輸曼倩饑
尚賴故人遙省憶
發揮春色有新詩

萬古流空一鳥沈
衣冠常苦事違心
七行俱下知君舊
四者難并笑我今
梅已偷春成國色
雲猶憑臘造天陰

美人綠綺煩遙贈莫致南金增永吟

寄題倪敦復北軒

倪郎才韻照冰壺北向開軒頗自娛
簷度蕙風鳴鵲鵲壁經梅雨畫
蟬觥籌交錯銀河挂文史縱橫角
簾鋪官舍私居同是漫莫嗟三徑就荒蕪

次韻子由題摘星亭

述樓舊址

崑崙左右兩招提中起孤高雉堞西
不見燒香成宿霧虛傳裁錦作障泥
螢流花苑飛星亂蕪滿春城綠髮齊

長憶凭欄風雨後斷虹明處海天低

遊鑑湖

畫舫珠簾出繞牆天風吹到芰荷鄉水光入座杯盤瑩
花氣侵人笑語香翡翠側身窺綠酒蜻蜓偷眼避紅妝
葡萄力緩單衣怯始信湖中五月涼

春日寓直有懷參寥

觚稜金爵自岩龕藏室春深更寂寥捫蝨幽花散露葉
岸中高柳轉風條文書几上鬚髯變鞍馬塵中歲月銷

何日一筇江海上與君徐步看生潮

顯之禪老許用草菴見處詩以約之

椽葉岡頭釋馬銜區中竒觀得窮探崖空飛鼠聲相應
江靜羣峰影倒涵居士碧雲裁秀句道人哀玉扣清談
偶成二老風流事不是三乘宿草菴

和孫莘老遊龍洞

葦蕭傳火度冥冥乍入清都醉魄醒草隱月崖垂鳳尾
風生陰穴帶龍腥壁間泉貯千鍾碧門外天橫數尺青

更欲仗節留頃刻却疑朝市已千齡

西城宴集元祐七年三月上已詔賜館閣官花酒
以中澣日遊金明池瓊林院又會於慶國夫人
園會者二十有六人

二首

春溜泱泱初滿池晨光欲轉萬年枝樓臺四望烟雲合
簾幕千家錦繡垂風過忽聞花外笑日長時奏水中嬉
太平誰謂全無象寓在羣仙把酒時

宜秋門外喜參尋豪竹哀絲發妙音金爵日邊樓壯麗

彩虹天際卧清深已煩逸少書陳迹更屬相如賦上林
猶恨真人足官府不如魚鳥自飛沈

寄題趙侯澄碧軒

風流公子四難并更引清漪作小亭潤及玉階春漲雨
光浮藻井夜涵星捲簾几硯成圖畫倚檻鬚眉入鏡屏
何日解衣容借榻卧聽螭口瀉泠泠

贈劉使君景文

落落衣冠八尺雄魚符新賜大河東穰苴兵法由司馬

曹植詩原出國風拈筆古心生篆刻引觴俠氣上雲空
石渠病客君應笑手校黃書兩鬢蓬

劉遜父示以寧齋詩二軸次韻還之

揚舲偶過海邊州一見名郎破百憂荀氏諸龍俱俊偉
河東小鳳最風流明珠白壁堪投報細草幽花入獻酬
別駕舊齋何足念文昌新府待公遊

次韻宋履中近謁大慶退食館中

翠華初到殿中間三館諸儒共一班迎謁曉廷清蹕近

退穿春仗綵旂閒病來怕飲東西玉老去慚陪大小山
知續春明退朝錄借觀當奉一鴟還

會蓬萊閣

冠裳列坐灑清風軒外時聳韻籜龍人面春生紅玉液
銀盤烟覆紫駝峰天涵秋色山山共樹攪鄉思葉葉重
正欲買船江北去為懷明德更從容

秋興擬杜牧之

鼓鼙夜戰北牕風霜葉鋪堦疊亂紅一段新愁驚枕上

幾聲悲雁落雲中眼前時節看馳馬日下生涯寄斷蓬
弟妹別來勞夢寐杳無消息過江東

秋興擬白樂天

不因霜葉辭林去的當山翁未覺秋北里酒錢煩屢索
南州詩債懶頻酬欲歌金縷羞紅粉擬插黃花避白頭
底事登臨好時節等閒收拾許多愁

中秋口號

雲山簷楯接低空公宴初開氣鬱蔥
照海旌旛秋色裏

激天鼓吹月明中香槽旋滴珠千顆歌扇驚圍玉一叢
二十四橋人望處台星正在廣寒宮

還自湯泉十四韻

歲晚倦城郭聯驂度紫莢天黃雲脚亂村黑鳥翎訛潦
水侵生路晴天落漫坡澄江練不卷溫井鑑新磨漁火
分星遠沙鷗散點多霸祠題玉筋龍窟受金波琬琰存
吳事兒童記楚歌孤龕瘦居士雙塔老頭陀飛鼠鳴深
穴胡蜂結巧窠晚參團白足昏梵禮青螺雲馭沈荒甃

仙舂沒淺莎杖藜從莫逆談笑入無何
淡蕩日連霧蕭騷風轉阿華清俄夢斷回首失烟蘿

寧浦書事

揮汗讀書不已人皆怪我何求我豈更求聞達日長聊
以消憂

泗州東城晚望

渺渺孤城白水環舳舻人語夕霏間
林梢一抹青如畫應是淮流轉處山

春日

金屋舊題煩乙子
蜜脾新採賴蜂臣
蜻蜒蛺蝶無情思
隨例顛忙過一春

秋日 二首

霜落邗溝積水清
寒星無數傍船明
菰蒲深處疑無地
忽有人家笑語聲

月團新碾瀹花甕
飲罷呼兒課楚詞
風定小軒無落葉
青蟲相對吐秋絲

春日偶題呈錢尚書

三年京國鬢如絲，又見新花發故枝。
日典春衣非為酒，家貧食粥已多時。

蚤春

黃金軟軟滿垂楊，尚有春寒到畫堂。
酒力漸銷歌扇怯，入簾飛雪帶梅香。

無題

掃地燒香閉閣眠，簾紋如水帳如烟。
客來夢覺知何處，

挂起西牕浪接天

金山晚眺

西津江口月初弦
水氣昏昏上接天
清渚白沙茫不辨
只應燈火是漁船

處州間題

清酒一杯甜似蜜
美人雙鬢黑如鴉
莫誇春色欺秋色
未信桃花勝菊花

口號

美酒忘憂之物流光過隙之駒不稱人心十事常居
八九得開口笑一月亦無二三莫思身外無窮且賭
尊前見在功名富貴何異楚人之弓城郭人民問取
遼東之鶴付與香鈿畫鼓盡歡美景良辰欲奏長謠
聊陳短韻

平原居士今無影鸚鵡空洲誰舉杯猶有漁陽搥鼓在
為君醉後作輕雷

司馬樵

字才仲 陝州夏臺人 用蘇軾
薦應制舉中等為錢塘幕官

洛春謠

洛陽碧水揚春風 銅駝陌上桃花紅
高樓疊柳綠相向 綃帳金鸞香霧濃
錦裘公子五陵客 拳毛赤兔雙蹄白
金鈎寶玦逐飛香 醉入花叢惱花魄
青娥皓齒別吳倡 梅粉妝成半額黃
羅屏繡幙圍寒玉 帳裏吹笙學鳳凰
細綠圍紅曉烟溼 車馬駢雲櫛櫛瓊
藥杯深琥珀濃 鴛鴦枕鏤珊瑚澁
吹龍笛歌白紵 蘭席淋漓日將暮
君

不見灞陵岸上楊柳枝青青送別傷南浦

妾薄命

二月東風吹不惡後園桃李先春落高堂去婦對花愁
君恩非輕妾命薄憶昔三星光在天煌煌車馬朱門前
結褵幸得事君子願託絲羅千百年履痕纔遍君家地
相看已覺君心異門外新歡一破顏室中舊愛雙垂淚
妾心比玉自堅貞君眼如星到處明女子睽離泰山重
丈夫棄置鴻毛輕莫誇綠髮紅顏好女色由來不長保

君不見灞上鑾輿袂袂回阿嬌已向長門老

豐稷

字相之明州鄞人登第為穀城令以廉明稱使高麗海舟遇風幾覆衆惶擾莫知所為稷神色自若神宗召對問卿昔遭海風何以不畏對曰仗陛下威靈何畏之有帝悅擢監察御史徙著作佐郎吏部員外郎提點利州成都路刑獄入為殿中侍御史遷右司諫抗言宗王僭侈官吏承奉皆宜糾正改國子司業歷祭酒除刑部侍郎兼侍讀出知潁州江寧府拜吏部侍郎又出知河南府蓋章惇素憾稷欲以道路困之徽宗立召為左諫議大夫首劾蔡京姦狀京遂去翰林時宦官漸盛稷懷唐書仇士良傳讀於帝前曾布將拜相稷約同僚共論之值轉工部尚書布遂相稷謝表有佞臣之語帝

問為誰對曰曾布也改禮部帝待之厚欲大用而積忤貴近終不得留竟用密直守越蔡京得政修舊怨貶海州團練副使安置台州卒
年七十五建炎中追復學士謚清敏

荷花

桃杏二三月此花泥滓中人心正畏暑水面獨搖風淨
刹如金湧嘉賓照幕紅誰歌采菱曲舟在晚霞東

鄭獬

字毅夫安陸人少負俊才詞章豪偉峭整流革不敢望舉進士第一通判陳州入直集賢院度支判官修起居注知制誥英宗即位治永昭山陵悉用乾興制度獬言國用空乏宜飭有司從儉又請申

詔中外許令陳言以訪時政得失帝嘉納之出知
荆南還判三班院神宗初召鄒夕對內東門命草
三制賜雙燭送歸舍入院遂拜翰林學士權發遣
開封府以不用新法為王安石所惡出知杭州徙
貴州引疾乞提舉鴻
慶宮卒年五十一

採鳧茨

朝攜一筐出暮攜一筐歸十指欲流血且急眼前饑官
倉豈無粟粒粒藏珠璣一粒不出倉倉中羣鼠肥

明皇

四海不搖草九重藏禍根十年傲堯舜一笑破乾坤猿

狄皆冠冕豺狼盡子孫潼關兵已破會憶老臣言

蠡口絕句

千重越甲夜城圍戰罷君王醉不知若論破吳功第一
黃金印合鑄西施

朱長文

字伯原吳郡人著書閱古名動京師元祐中召為
太學博士遷秘書正字曾著琴史有文集三百卷

別號

樂圃


詠齋偶書呈子通無隱

風志在蕭閒獲此遯幽跡喬林無冬春蒼鵲異晨夕旁
窺疑好峰俯瞰驚峭壁浩然溪山興盡在陶潛宅杖藜
行水邊萍際湛空碧良魚不輕游弱魚猶自惜吟髭不
禁霜曉鏡見蚤白古人已深歎信是林園客遣累假禪
鋒陶情任詩格寄聲招友人來看亭前柏

東隱者

不愛紛華愛寂寥松風竹月共蕭蕭因隨野鶴過三徑
每對江鷗洗一瓢無復塵埃沾短褐尚思烟水泛歸橈

道人肯與羲之友飛錫重來莫待招



宋元詩會卷二十五